

## Fóó, kpizúv na nivááni

Fóó wɔɔjɔɔná, nge koodjúu kpizúv. Háli kila tuwú kibáázi kpizá dju. Kpizá waabú né, nge nivááni wóngɔni tɔndɔwúv kpizá. Báa tééré wenkí ge fóó woobó si kɔkógóri kpizá né, si katála né, nivááni wénlézi ke tubó tikóri kpizá. Báa ngbeére, bilé bidaá ge bowe. Wíre né, nge fóó sisí:

Nhíni ge mánlám na magba uráa bana. Mánlám wahála modjúu kpizúv mava ki lím háli kibú tuwú, na kúndjív bika módónjyúú báa kpizídje modóó? Mángu malá nhíni na magba máhmiíláa bana. Modjúu kpizúv na mánzím nyóósi?

Fóó wɔɔjɔɔ kamáázi tímm... né, nge koobó kpizúv kutoluú kabáa bɔɔwú, nge kaazúv bɔɔwú-daá bika kagujúv, nge koovu téédi. Kujúv riké ge buga bika kalá tɔvrée. Budásiyóó né, nge nivááni waadála tɔcáɲ tikpa tuwú nakírí-daá si tíféézi na títóó kpizá. Tíwe tuwú-daá ge naáru weebééɲ ade né, waana kalá nyú. We nbulé. Nge waawílí tuganáa, nge tɔrɔɲa tuzúv bití. Tóm wentí ge tuna dɛdée nába, ade wóndórónyóó kalá? Đóngbɔɔnáa lé. Ketengere mínnaa ade laadóó unyɔ kalá?

Tíwe tivókée tuwú-daá náa ge budási né, bee Đóró wɔɔgóni wéndjé. (Múde-dúv sisí: tɔɔ ma nkayáa máyídje ge bánjyáa Đóró: agbezeyí ge bánjyáa Đóró.)

Tóó, nivááni waana Đóró wéndjé né, nge tubóózi yi sisí: ketengere nyánnáa ade unyɔ kalá? Nge Đóró sisí: aayí yoo, aayí!

Nivááni we bití-daá, dǎnlám tóm tuna nhíni. Aayí, budásiyóó né, Fíyawó nbulé, agbaɲ kúru-kúru ge bánjyáa bilé. Fíyawó waajuvná ti né, nge tulɔ lowú sisí: ketengere nyánnáa ade laadóó unyɔ kalá? Nge ulé sisí: aayí yoo, aayí. Nnaamú ge nivááni waabáázi fifini tím, nge sisí: dǎngbɔɔnáa lé tóm tuna. Đáágú dǎjǎó cé faala, bika kídjím wéndjii dǎa bɔɔrí? Nge niváwu naáru sisí: dɛdée nába, iyéle magba mɔgóri kpizá cúkɔ!

Nge tuganáa sisí: nyébééna ade wɔɔnyɔ kéle tuwú-déezi, na ndó sisí: nyángbáa ngóri kpizá né, nyányi wenbí biyéle ge ade wónnyóó kelá né? Yele dǎtulí wenbí-rɔɔzi ade wɔɔnyɔ kelá né naaní dǎɲmáti kpizá-dée tóm. Babamáa ɲmature né ge baagúsi né, kebee tangbaká kelé kɔɔgóni kéndjé tákám, tákám, tákám; tangbaká-dée kúútawá wénwii ku bilé yoo! (Welesirú sisí: nuvó weená-daá ge koozúu takámwá. Múde-dúv sisí: bɔɔzirú njúbre. Welesirú sisí: nyána ma.)

Tóó, nivááni waana tangbaká né, nge tiigóo tɔyáa ke. tangbaká, nge keedísi sisí: «nááá!» Nge tilé tubóózi ke sisí: ketengere nyánnáa ade laadóó unyɔ kelá? Nge tangbaká woobúsi we sisí: fóó yoo, fóó!

Nge nivááni sisí: wé! Nge tangbaká sisí: fóó yoo, fóó!

Nge nivááni sisí dǎdánnu. Nnaamú ge tangbaká woogóo bicáári sisí: izé yoo..., fóó ge! Ize dǎsam, fóó ge! Nnaamú ge nivááni waaya dǎmá tikpóó sewóó. Tugbóó sewóó né, nge fóó waalí kanyáa katá nivááni-wóró háli tilé

tise tísúv lááwú. Fóó weeyéé baaná né, nge koozúu kakábıstı tangbaká-wóró. Fóó waadála né, tangbaká wénzée. Nge fóó waabáázı tangbaká cáadı. Mídáná fóó tánnáa tangbaká ızıre né? Báa le ge fóó weegéti tangbaká, asée weezelı ke, káma tangbaká weeyele ná ge fóó tabúzi kakpa nıváanı. Buga nıváanı né, báa le ge tilé tuna fóó, tidánzım, asée tuya damá. Ngú bilé ge fóó kelé kedényelı ti, káma kedée kpızá nıváanı waanmıılı yi né arózi. Mámúde wóolóo kutolo-dóóre-dó.